


Los ntawm Thawj Tswj Hwm
Thomas S. Monson



Khiav tej Hauj Lwm

Koj puas paub tias lub Koom Txoos uas tau muab txum tim rov qab los muaj 98 xyoos ua ntej muaj 100 ceg txheem ntseeg? Tiam sis tsis tau dhau 30 xyoos tom qab ntawd, es lub Koom Txoos twb tsa 100 ceg txheem ntseeg ntxiv. Thiab yim xyoo tom qab ntawd lub Koom Txoos twb muaj 300 tawm ceg txheem ntseeg. Hnub no peb muaj 3,000 tawm ceg txheem ntseeg.

Vim li cas lub koom txoos no loj hlob sai zuj zus tuaj? Yog vim tib neeg paub peb zoo dua los? Yog vim peb muaj tej tsev teev ntuj zoo nkauj los?

Tej no tseem ceeb, tiam sis lub Koom Txoos no loj tuaj niaj hnub no vim tus Tswv twb qhia tias yuav muaj li no. Nyob hauv phau Lus Qhuab Qhia thiab Kev Khi Lus, Nws hais tias Nws yuav khiav Nws txoj hauj lwm nrawm nroos thaum lub sij hawm tsim nyog.¹

Vim peb yog peb Leej Txiv Saum Ntuj Ceeb Tsheej cov me nyuam ntsuj plig, Nws txib peb los nyob hauv lub ntiaj teb thaum lub caij nyoog no kom peb yuav pab khiav txoj hauj lwm tseem ceeb no.

Tus Tswv, raws li kuv paub, yeej tsis tau qhia tias yuav ua Nws txoj hauj lwm nyob hauv lub ntiaj teb no xwb. Tiam sis, Nws txoj hauj lwm yeej nyob mus ib txhis. Kuv ntseeg tias Nws khiav Nws tej hauj lwm nrawm nroos nyob hauv lub ntuj ntsuj plig. Kuv kuj ntseeg tias tus Tswv, dhau los ntawm Nws cov tub qhe nyob ntawd, tab tom npaj ntau tus ntsuj plig los txais txoj moo zoo. Peb txoj hauj lwm yog nrhiav peb cov uas tas sim neej lawm thiab mus rau lub tuam tsev thiab ua cov kab ke dawb

ceev uas yuav pab cov uas tuag lawm muaj cib fim zoo ib yam li peb.

Thawj Tswj Hwm Brigham Young hais tias txhua tus Neeg Ntseeg hauv Hnub Nyoog Kawg uas zoo yeej muaj hauj lwm ntau (1801–77). “Lawv ua dab tsi nyob ntawd? Lawv qhuab qhia, qhuab qhia txhua lub sij hawm, thiab npaj kev rau peb khiav peb tej hauj lwm nrawm nroos nyob hauv cov tuam tsev nyob no thiab nyob lwm qhov chaw.”²

Nim no, kev ua hauj lwm nrhiav tsev neeg zaj keeb kwm yeej tsis yooj yim. Nrog nej cov uas los ntawm Scandinavia, kuv pab nej nyuaj siab. Piv xam hais tias, kuv cov poj koob yawm txwv uas los ntawm Sweden, kuv yawg lub npe hu ua Nels Monson; nws txiv lub xeem tsis yog Monson tiam sis nws lub npe yog Mons Okeson. Mon txiv lub npe hu ua Oke Pederson, thiab nws txiv lub npe yog Peter Monson—rov qab los rau Monson dua.

Tus Tswv xav kom nej thiab kuv yuav mob siab nrhiav peb tsev neeg zaj keeb kwm. Kuv xav tias qhov thib ib uas peb yuav tsum ua yog peb yuav mob siab ua peb txoj hauj lwm no yog ua kom muaj peb Leej Txiv Saum Ntuj Ceeb Tsheej tus Ntsuj Plig nrog nraim peb nyob. Thaum peb ua neej ncaj ncees raws li peb paub peb yuav tsum ua, ces Nws yuav qhib kev rau peb txais cov koob hmoov uas peb mob siab thiab rau siab nrhiav.

Peb yuav ua yuam kev, tiam sis tsis muaj leej twg uas yuav txawj nrhiav tsev neeg zaj keeb kwm yog tias lawv tsis yog ib tug uas nyuam qhuav pib ua ntej. Yog li ntawd,

peb yuav tsum mob siab ua txoj hauj lwm no, thiab peb yuav tsum npaj rau tej kev nyuaj. Nov tsis yog ib txoj hauj lwm yooj yim, tiam sis tus Tswv tau muab rau nej ris, thiab Nws tau muab rau kuv ris qhov no.

Thaum nej nrhiav nej tsev neeg zaj keeb kwm, nej yuav ntsib tej yam uas tav nej kev, thiab nej yuav hais rau nej tus kheej hais tias, “Tsis muaj dab tsi ntxiv uas kuv ua tau.” Thaum twg nej xav li ntawd, cia li txhos caug thiab thov tus Tswv qhib txoj hau kev, thiab Nws yuav qhib kev rau nej taug. Kuv ua tim khawv hais tias qhov no muaj tseeb.

Leej Txiv Saum Ntuj Ceeb Tsheej hlub Nws cov me nyuam nyob hauv lub ntuj ntsuj plig ib yam li Nws hlub nej thiab kuv. Hais txog txoj hauj lwm cawm peb cov neeg tuag dim, tus Yaj Saub Yauxej Xamiv hais tias, “Ua nim no tab tom ua rau Vajtsv tej hauj lwm yuav tiav tas sai sai no, thiab tej yam uas cov Yaj Saub hais tseg muaj tiav log, thaum tab tom txhim tsa Vajtsv lub nceeg vaj hauv ntiaj teb no, thiab rov qab kho txhua yam kom zoo li qub, tus Tswv tau qhia peb txog txoj kev lav ris thiab txoj koob hmoov no, thiab peb raug txib los ua kev cai raus dej sawv peb cov neeg tuag lub cev.”³

Hais txog peb cov poj koob yawm txwv uas tau tas sim neej ua ntej lawv paub txog txoj moo zoo, Thawj Tswj Hwm Joseph F. Smith (1838–1918) hais tias, “Dhau los ntawm peb tej hauj lwm sawv lawv cev ces yuav daws tau tej hluas uas muab lawv khi cia, thiab yuav tshem txoj kev tsaus ntuj mus, ces qhov kaj yuav ci los thiab cov uas nyob hauv lub ntuj ntsuj plig yuav pom tej hauj lwm uas lawv cov me nyuam hauv ntiaj teb no tau ua rau lawv lawm, thiab lawv yuav muaj kev zoo siab vim nej tau ua tej hauj lwm no.”⁴

Muaj ntau plhom tus me nyuam ntsuj plig ntawm peb Leej Txiv Saum Ntuj Ceeb Tsheej uas tsis tau hnov txog Khetos lub npe ua ntej lawv tau tuag thiab mus nyob rau hauv lub ntuj ntsuj plig. Tiam sis nim no lawv twb kawm txog txoj moo zoo thiab tos ntsoov mus txog hnuv thaum nej thiab kuv yuav ua kev tshawb fawb kom qhib kev rau peb mus rau hauv tus Tswv lub tsev thiab sawv lawv cev ua tej hauj lwm uas lawv ua tsis tau lawv tus kheej.

Kuv cov kwv tij thiab cov muam, kuv ua tim khawv tias tus Tswv yuav foom koob hmoov rau peb thaum peb lees txais thiab ua raws li qhov no.

QHIA LOS NTAWM TSAB XOY NO

Cia li xav txog ib zaj dab neeg los ntawm koj tsev neeg zaj keeb kwm thiab qhia zaj dab neeg no rau cov uas koj mus xyuas. Tej zaum koj yuav xav siv tej lus nug nyob ntawm cov me nyuam zaj ntawm Thawj Pawg Thawj Tswj Hwm Tsab Xov (phab 6) kom yaum cov uas koj mus xyuas kom lawv qhia lawv tej zaj dab neeg. Xav seb puas nyeem Lus Qhuab Qhia thiab Kev Khi Lus 128:15 thiab sib tham txog qhov uas yus sawv cev rau peb cov poj koob yawm txwv ua cov kab ke hauv lub tuam tsev yog ib qho tseem ceeb.

LUS CIM

1. Lus Qhuab Qhia thiab Kev Khi Lus 88:73.
2. *Teachings of Presidents of the Church: Brigham Young* (1997), 280.
3. *Teachings of Presidents of the Church: Joseph Smith* (2007), 409.
4. *Teachings of Presidents of the Church: Joseph F. Smith* (1998), 247.

TUB HLUAS NTXHAI HLUAS

Kuv Puas Txaus Siab Ua Ntaub Ntawv Nrhiav Tsev Neeg Caj Ceg?

Los ntawm Emma Abril Toledo Cisneros

Kuv tau koom tes pab peb ceg txheem ntseeg ua Ntaub ntawv txog 50,000 lub npe. Thaum xub thawj nws nyuaj heev. Ob peb lub sij hawm tej npe uas kuv txais lawm twb nyuaj rau kuv nyeem, thiab tej lub sij hawm kwv twb xav xa tej npe ntawd rov qab mus thiab txais ib pawg tshiab. Tiam sis kuv paub tias yog txhua tus xav zoo li ntawd, ces yuav muab tej npe ntawd tseg rau qhov kawg. Ua rau kuv xav txog ntau tus neeg uas tos ntsoov nyob hauv lub ntuj ntsuj plig, thiab kuv txiav txim siab tias kuv yuav sim nyeem cov npe ntxiv thiab sau ntawv tsis yuam kev.

Kuv kawm kom hlub cov neeg no. Kuv to taub tias lawv twb xav tau kev pab, thiab peb kuj xav tau lawv txoj kev pab. Kuv to taub tias Leej Txiv Saum Ntuj Ceeb Tsheej txoj hau kev zoo tag nrho twb suav txhua leej txhua tus. Thaum peb ua raws li cov thawj coj uas Nws tau xaiv tej kev tshoov siab thiab tej lus qhia, ces peb yuav pom Nws txoj kev hlub tshua uas nyob mus ib txhis.

Kev ua ntaub ntawv nrhiav tsev neeg caj ceg yog ib qho uas kuv nyiam heev. Kuv kawm kom nyiam thiab saib tsev neeg zaj keeb kwm rau nqi. Kuv kuj tau txais tej txiaj ntsim uas muaj nqi heev los ntawm peb tus Tswv thaum kuv mloog lus ua ib yam yooj yim npaum li kev koom tes pab ua ntaub ntawv nrhiav tsev neeg caj ceg.

Tus sau zaj no nyob hauv Veracruz, Mev Teb.

COV ME NYUAM

Paub Koj tej Zaj Dab Neeg

Koj niam koj txiv thiab koj pog koj yawg twb muaj ntau yam xwm txheej—muaj tej yam uas koj yeej tsis paub! Lawv tej zaj dab neeg ib txhia yuav ua rau koj luag, thiab yuav pab koj muaj kev ntseeg txog Leej Txiv Saum Ntuj Ceeb Tsheej. Tiam sis txawm lawv yog neeg laus los tej lub sij hawm lawv txaj muag. Siv tej lus nug

no kom pab lawv nco txog tej zaj dab neeg uas lawv nyiam heev thiab sau ntawv los yog kos duab txog tej yam uas lawv teb.

1. Qhia kuv txog peb zaj uas koj nco ntsoov uas ua rau koj zoo siab tshaj plaws.
2. Lub sij hawm uas ua rau koj txaj muag tshaj plaws yog dab tsi?
3. Qhia kuv txog hnuv uas kuv yug los.
4. Koj nyiam ua dab tsi thaum koj yog ib tug me nyuam?
5. Koj tau ua li cas kom txais tau ib zaj lus tim khawv txog txoj moo zoo?

© 2014 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub txhais ua lus Akiv : 6/14. Pub txhais ua lus Hmoob: 6/14. Kev txhais lus *First Presidency Message, June 2014*. Hmong. 10866 295



Yexus Khetos lub Luag Hauj Lwm Los Saum Ntuj Los: Tus Txhawb Pab

Ua tib zoo thov Vajtswv kawm tej yam no thiab nug seb koj yuav tsum qhia dab tsi. Qhov uas koj to taub tus Cawm Seej lub neej thiab lub luag hauj lwm yuav ua rau koj txoj kev ntseeg Nus loj tuaj thiab foom koob hmoov li cas rau cov uas koj saib xyuas tom tsev? Kom tau ntaub ntauv xov xwm ntxiv, cia li txuas rau reliefsociety.lds.org.

Kev Ntseeg, Tsev Neeg, Kev Pab

Nov yog ib zaj los ntawm tej zaj cov Mus Saib Xyuas Tom Tsev tsab Xov uas hais txog tus Cawm Seej lub luag hauj lwm.

Thaum peb txhawb pab lwm tus, peb yog Yexus Khetos cov thwj tim tiag tiag, tus uas tau coj yam ntxwv rau peb xyaum. Thawj Tswj Hwm Thomas S. Monson hais tias: “Cov uas xav tau kev pab nyob ib puag ncig. . . . Peb yog tus Tswv txhais tes hauv ntiaj teb no, uas twb raug txib kom mus pab thiab txhawb nqa Nws cov me nyuam.”¹

Linda K. Burton, Koom Haum Niam Tsev tus tuam thawj tswj hwm, qhia hais tias, “Yog tias peb xyaum ua, peb txhua tus yeej yuav ua tau zuj zus li tus Cawm Seej thaum peb pab tus Tswv cov me nyuam. Kom pab peb ib leeg hlob tau ib leeg zoo me ntsis, kuv xav kom peb nco cov lus no: ‘xam saib ua ntej ces mam li pab.’ . . .Thaum peb ua li no, peb tab tom khaws peb tej kev khi lus, thiab peb txoj kev pab, zoo li Thawj Tswj Hwm Monson, yuav ua puav pheej txog peb txoj kev ua ib tug pab coj.”²

Peb thov tau Vajtswv txhua hnub kom pom tej cib fim pab lwm tus. David L. Beck, Koom Haum Tub Hluas tus tuam thawj tswj hwm hais tias, “Leej Txiv Saum Ntuj Ceeb Tsheej yuav coj nej kev, thiab cov

tim tswv yuav pab nej. Nej yuav muaj hwj chim foom koob hmoov rau lwm tus thiab cawm lawv cov ntsuj plig dim.”³

Los ntawm cov Vaj Lug Kub

Mathais 20:25–28; 1 Nifais 11:27–28; 3 Nifais 28:18

Los ntawm Peb zaj Keeb Kwm

Nyob hauv lub tuam rooj sab laj thaum lub Yim Hli Ntuj xyoo 1856, Thawj Tswj Hwm Brigham Young (1801–77) tshaj tawm tias cov neeg pioneer rub laub tseem hla tej tiaj nrag thiab txhua tus yuav tsum khaws cov khoom mus pab lawv tam sim ntawd. Lucy Meserve Smith sau hais tias cov poj niam “hle lawv cov tiab hauv qab, thom khwm, thiab txhua yam uas lawv hle tau, nyob hauv lub Tsev Kheej kiag ntawd, thiab tso [tej ntawd] rau hauv tsheb.”

Thaum cov neeg pioneer uas lawv cawm dim pib tuaj txog lub nroog Salt Lake City, Lucy sau hais tias, “Kuv yeej tsis tau txaus siab rau tej hauj lwm kuv tau ua hauv kuv lub neej npaum li lub sij hawm ntawd uas kuv ua hauj lwm pab lawv, vim zoo li sawv daws koom siab heev. Kuv tsuas mus rau hauv lub tsev muag khoom xwb thiab

qhia lawv tias kuv xav tau dab tsi; yog tias kuv yuav ntaub, ces lawv muab ntsuas thiab muab rau kuv pub dawb xwb.”⁴

Thawj Tswj Hwm George Albert Smith (1870–1951) hais txog kev txhawb pab lwm tus: “Peb txoj kev zoo siab mus ib txhis yuav muaj ntau npaum li peb mob siab pab lwm tus.”⁵

Xav Txog Qhov No

1. Kev thov Vajtswv yuav ua li cas kom pab peb ua cuab yeej nyob hauv tus Tswv txhais tes?
2. Qhov uas peb txhawb pab lwm tus yuav ua li cas pab peb ua raws li peb tej kev khi lus?

LUS CIM

1. Thomas S. Monson, “What Have I Done for Someone Today?” *Liahona*, Kaum Ib Hlis Ntuj 2009, 86.
2. Linda K. Burton, “First Observe, Then Serve,” *Liahona*, Kaum Ib Hlis Ntuj 2012, 78, 80.
3. David L. Beck, “Your Sacred Duty to Minister,” *Liahona*, Tsib Hlis Ntuj 2013, 56.
4. Lucy Meserve Smith, nyob hauv *Daughters in My Kingdom: The History and Work of Relief Society* (2011), 36–37.
5. George Albert Smith, nyob hauv *Daughters in My Kingdom*, 77.

© 2014 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub txhais ua lus Akiv : 6/14. Pub txhais ua lus Hmoob: 6/14. Kev txhais lus *Visiting Teaching Message*, June 2014. Hmong. 10866 295